

CELEBRACIÓN EN OS COTOS (na igrexa)

7-8 de maio do 2022

IV SEMANA DO TEMPO DA PASCUA



OS COTOS COA IGUALDADE VERDADEIRA DAS PERSOAS,
COS POBOS QUE SOFREN INJUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA
E CON RESPONSABILIDADE PERSOAL ANTE A COVID-19



1.- ENCONTRO DA COMUNIDADE

(tod@s de pé)

@ monitor/a está na sé

SAÚDO DE BENVIDA

🎵 *nº 1 ou 82 A Cristo cantamos*

Celebrante:

Benvidos sexamos todos a esta celebración. Reunímonos para compartir en comunidade a nosa fe no nome do Pai, do Fillo e do Espírito Santo.

A lectura do Libros dos Feitos dos Apóstolos que hoxe imos escoitar amósanos que a Palabra de Deus é para quen quere escoitala. Por iso os apóstolos empezan a facer o camiño do anuncio do evanxeo índose máis alá das terras de Xesús, pois o evanxeo non ten nin muros nin alambradas, é para quen quere escoitalo.

Hoxe a historia é a mesma, e así, nesta xornada reunímonos porque nós queremos escoitar o evanxeo. Nel, hoxe, atopámonos con que Xesús é o noso Bo Pastor. El fálanos, El coñécenos, El danos vida eterna, El cóidanos; e nós escoitamos a súa voz e seguímolo.

Seguindo a celebrar a Pascua con Xesús, non estamos sos. Formamos parte da gran comunidade dos seguidores do Evanxeo, e Cristo Resucitado está connosco guiándonos, como o Pastor o seu rabaño.

ACTO PENITENCIAL

Celebrante: *A nosa vida está chea de atrancos que non nos deixan camiñar alegres e pesan no noso corazón. Para poder ser vida de Pascua temos que pedir perdón e comprometernos:*

Monitor/a

- Polas veces que non poñemos atención á Palabra viva do Evanxeo, e enchemos a cabeza de ruídos e palabras sen vida. Perdóanos Señor, e guía os nosos pasos
- Polas veces que soamente escoitamos o que nos interesa, e facémonos xordos a tantas e tantas voces que non merecen permanecer no silencio. Perdóanos Señor, e guía os nosos pasos
- Polas veces que pretendemos que os demais escoiten e fagan caso ás nosas voces, pero nós non as facemos cribles nos feitos e somos incoherentes. Perdóanos Señor, e guía os nosos pasos

Celebrante: *Deus todopoderoso teña piedade de nós, dos que teñen un lugar no noso corazón e na nosa vida, dos que se atopan sos e perdidos nos camiños da vida. A todos nos conceda o Señor o perdón dos pecados, a todos nos abra os ollos á súa Pascua e a todos por Cristo Resucitado nos leve á vida eterna. Amén.*

ORACIÓN PROPIA DO DÍA

Celebrante: *Rematamos a primeira parte da celebración presentando no silencio o que rebule no noso interior. Facémolo doídos e necesitados de paz, e facémolo co bo exemplo que nos dá Cristo, a quen hoxe proclamamos coma o noso Bo Pastor.*

(Silenzo)

Celebrante:

Deus de misericordia, guíanos á asemblea do ceo; que a pesares das nosas debilidades e da xordeira á túa Palabra, o teu pobo cheguemos aos pastos da eternidade, onde nos agarda o Bo Pastor. Pedímoscho polo mesmo Xesucristo Resucitado, Noso Señor. Amén.

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Celebrante: *O texto que hoxe proclamamos do Libro dos feitos dos apóstolos vains amosando que os primeiros cristiáns non calan nin esconden a Palabra de Deus. Vívena con quen quere escoitala.*

Logo o evanxeo amósanos en Xesús ao Bo Pastor. El fálanos, El coñécenos, El dános vida eterna, El cóidanos; e nós escoitamos a súa voz e seguímolo. Cristo é o noso Bo Pastor que nos encamiña no facer comunidade. Escoitemos.

LECTURA DO LIBROS DOS FEITOS DOS APÓSTOLOS

Daquela pasando Paulo e mais Bernabé desde Perxe, seguiron a Antioquía de Pisidia. Un día de sábado entraron na sinagoga e sentáronse. Moitos xudeus e prosélitos practicantes seguiron a Paulo e Bernabé, que, falando con eles, os animaban a perseverar na graza de Deus.

Para o outro sábado xuntouse case toda a cidade para escoitar a palabra de Deus, pero os xudeus enchéronse de envexa, ao veren tanta xente, e opoñíanse cos insultos ao que Paulo dicía. Entón Paulo e Bernabé dixeron ousadamente:

- Tiñamos que anunciarvos a palabra de Deus primeiro a vós; pero, visto que a refugades e non vos considerades dignos da vida eterna, volvémonos cara aos pagáns; pois así nolo mandou o Señor: Púxente como luz das nacións, para lebares a salvación ata os confíns da terra.

Os pagáns, sentindo isto, enchíanse de alegría, louvando a mensaxe do Señor; e creron todos os que estaban destinados á vida eterna. Deste xeito a palabra de Deus espallábase por toda a bisbarra.

Pero os xudeus encirraron ás señoras de alta categoría que eran devotas e aos principais da cidade e promoveron unha persecución contra Paulo e Bernabé, expulsándoos

do seu territorio.

Estes, sacudindo contra eles o po dos seus pés, marcharon para Iconio, mentres os discípulos ficaban cheos de alegría e do Espírito Santo.

Palabra do Señor

🎵 *nº 8 ou 55 No colo da miña nai* **SALMO**

(en pé) *Leccionario I C páx 144 Xn 10, 27-30 EVANXEO*

PROCLAMACIÓN DO SANTO EVANXEO SEGUNDO XOÁN

Daquela, di Xesús:

- As miñas ovellas escoitan a miña voz: eu coñézoas e elas séguenme; eu doulles vida eterna, e non se perderán para sempre: ninguén mas quitará da man. Meu Pai, que mas deu, é máis ca todos, e ninguén pode arrepañalas da man do Pai. Meu Pai e mais eu somos un.


Palabra do Señor

(sentad@s) gardamos uns instantes de silencio para acoller a palabra no corazón

"EU SON
O BO
PASTOR"



*El fálanos, El coñécenos,
El dános vida eterna, El cóidanos*



*e nós escoitamos a súa voz
e seguímolo.*

ACOLLIDA DA AUGA

Celebrante: *Fixemos memoria do noso bautismo na celebración da vixilia pascual. Alí compartíamos a auga de toda a comunidade de Os Cotos, e agora aquí ante a auga de vida que nos une en parroquia, queremos lembrar os compromisos, queremos sentirnos confiados en Deus, queremos ser a COMUNIDADE que ten a Cristo coma Bo Pastor.*

Celebrante *Agradécémolle a Deus os dons da vida cos que El nos agasalla, e facémolo dicindo:*

BENDITO SEXAS POR SEMPRE SEÑOR

Monitor/a

* Deus creador de todas as cousas, que pola auga e o espírito, nos fixeche renacer á vida do evanxeo

BENDITO SEXAS POR SEMPRE SEÑOR

* Xesús, Ti que convidaches á primeira comunidade a ser testemuña anunciando o evanxeo a todas as xentes

BENDITO SEXAS POR SEMPRE SEÑOR

* Espírito Santo, que fas renacer á Igrexa polo alento da Pascua, e que nos convidas a ser auga viva

BENDITO SEXAS POR SEMPRE SEÑOR

RENUNCIAMOS AO MAL

Celebrante *Neste tempo da Pascua, deixándonos alumar pola luz da fe que recibimos no bautismo, renovamos os nosos compromisos na loita contra o mal.*

Monitor/a

○ **Estades dispostos** a loitar contra o mal que nos fai infelices e nos pecha no egoísmo?

Si, estamos dispostos

○ **Estades dispostos** a loitar contra todo o que nos aparta de Deus e fire aos irmáns e á terra?

Si, estamos dispostos

○ **Estades dispostos** a loitar para que no corazón non aniñe a cobiza, a agresividade e a envexa?

Si, estamos dispostos

PROFESIÓN DA FE

Celebrante Neste tempo da Pascua, deixándonos guiar da man do RESUCITADO compartimos o credo dicindo **SI CREEMOS**

Monitor/a:

Credes en Deus,

Pai e Nai de todos os homes e mulleres, que nos agarima nas súas mans coidadoras e acolledoras?

SI CREEMOS

Credes en Xesús Cristo, o seu fillo benquerido,

sempre atento para dar unha man resucitándonos para mellorar e medrar coidando con responsabilidade a vida cos demais?

SI CREEMOS

Credes no Espírito de Deus,

que nos alenta esperanza para soñar irmandade, que nos alenta forza para escandalizarnos ante a guerra, que nos alenta paz para sementala por toda a Terra?.

SI CREEMOS

Credes na Igrexa,

unha Igrexa que se fai crible en comunidade, acolledora, respectuosa e coidadora da terra e de todos os homes e mulleres que en Ucraia se sinten inxustamente tratados?

SI CREEMOS

ORACIÓN UNIVERSAL

Celebrante: O Señor Xesús, é o Bo Pastor, poñámonos nas súas mans para que sexa el quen nos guíe, para que el nos lidere como comunidade, e nós sexamos quen de seguilo. Digamos

SEÑOR DA VIDA, ESCOITA A NOSA ORACIÓN

Monitor/a:

✓ Señor, querendo facer igrexa, pedímosche que a exemplo do bo pastor sexamos capaces de medrar en diálogo, tolerancia e respecto. Oremos

✓ Señor, querendo facer comunidade, pedímosche con todos os homes e mulleres que á imaxe do Bo Pastor, son exemplo de igualdade e dignidade. Oremos

✓ Señor, querendo facer pobo, pedímosche polo noso pastor o Papa Francisco, para que nos siga guiando no camiño de facer evanxeo. Oremos

✓ Señor, querendo unha Pascua crible, pedímosche por todas as persoas que en Ucraia, ou onde sexa, non poden vivir en paz. Oremos

✓ Señor, nin ante o encoro esquezamos que esta terra é o pasto verdecente que nos dás todos os días. Oremos

Celebrante: Señor Xesús, que saibamos recoñecerte na comunidade de irmáns e irmás, pedímoscho a ti que vives e reinas Resucitado por sempre eternamente. Amén

3.- OS SIGNOS DA COMUÑÓN CON DEUS E COA COMUNIDADE

NOSO PAI

Celebrante: Temos escoitado a Cristo, o noso Bo Pastor, por iso guiados por el rezamos a Deus Pai como nos ensinou: NOSO PAI ...

SIGNO DA PAZ

Celebrante: A invitación que nos fai hoxe o Bo Pastor, é escoitalo e deixármonos guiar pola súa Palabra. É verdade que non é unha Palabra calquera, é a que nos dá azos para superar atrancos e canseiras; é a que nos alenta cando todo se fai rutina. É a que se nos dá en PAZ para facer camiño de Pascua. Sexamos nós, hoxe e sempre, homes e mulleres de paz.

COMUÑÓN

Celebrante: Pola man dos apóstolos aquela primeira comunidade botaba a anda abrindo as portas como igrexa para todos. Nós compartimos unha mesa en comunidade como signo dunha vida toda ela compartida, no que temos, no que somos, no que amamos, no que vale a pena. Ditosos nós convidados a esta festa da Pascua do Señor.

Señor, eu non son merecente de que entres no meu fogar, mais unha palabra túa abonda para me salvar

 *nº 9 ou 58 Acharte presente na vida*

4.- AVISOS E DESPEDIDA

ORACIÓN FINAL

Celebrante:

Señor, que o pan que temos compartido, signo da mesa eterna que nos preparas, nos enforteza para guiar os nosos pasos polos camiños do teu reino.

Pedímoscho por Cristo, Bo Pastor, que vive e reina Resucitado por sempre eternamente. Amén

Hoxe queremos sentirnos de verdade membros do rabaño, da comunidade de Xesús.

Escoitando a súa voz atopamos o vieiro axeitado para non calar abusos e violencias, veñan de onde veñan.

Vivamos a ledicia da Resurrección sentíndonos parte da gran igrexa de Xesús tal como El a quere coa participación de todos desde a responsabilidade de cada un de nós.

Avísase das misas (ver folla do mes)

Que teñamos un bo día, unha boa PASCUA e o Señor nos bendiga, † nos garde de todo mal e nos leve ao seu fogar de vida eterna. Amén




**Bendito ti, Xesús resucitado
coas feridas da lanza e mais os cravos.
Bendito para sempre ti es loado,
bendito ti, Xesús resucitado.**

- 1.- Bendito no aire fresco da mañá
e no cantar do paxaro ao espertar.
Bendito na auga fresca e rebuldeira
que dá vida aos prados e ás leiras.
- 2.- Bendito sexas na terra que agradece
o duro traballar coa súa anada,
bendito na esperanza que se esforza
por chegar a outra terra mellorada.

*(Esta cantiga é a número 84
do cancionero de Os Cotos)*

ALELUIA !! “CRISTO ESTÁ RESUCITADO”

UNIDADE PASTORAL D'OS COTOS



FELICES FESTAS DA PASCUA